



**M**artinus Rossheimus apud Belgas obscuro genere natus, sua fortitudine effecit, ut non immeritò inter præclaros Germaniæ militū ductores numeretur. Is ab adolescentia militiæ castra secutus, magnam rei bellicæ laudem acquisiuit. Itaq; cum Vuilhelmus Cluię dux pro Gallo contra Cæsarem esset, Martinus copijs conscriptis Brabantia inuasit, & magnum incolis terrorem artulit. proximum etiam erat, ut Louanium & Antuerpiam cepisset, si tormenta & res ad ea necessarias secum habuisset. Inde progressus, quacūq; iret omnia populatur, & pecuniam extorquet. uī etiam patefacta uia, filio regis Aureliano principi Carolo, qui Luxemburgicæ regioni bellū tunc faciebat, mense Augusto sese cōiunxit. Cum autem postea Cluiensis dux Cæsari reconciliaretur, atq; pax cum Gallo sanciretur, Rossemus ad Cæsareanos magno stipendio cōductus rediit, & à regina Maria Cæsaris sorore, quæ tum in Belgia rerum potiebatur, suis copijs præfectus fuit. Ab eo tempore Cæsari fidissimus extitit, & eius nomine res multas fortiter gessit. Cum etiam postea anno 1552 Henricus rex Gallię in Germaniā ad Rhenum usq; profectus esset, Rossheimius cum Belgicis copijs Campaniæ Gallicæ fines longē lateq; incēdijs uastabat, & Astenæum oppidum Mosæ uicinum, Lotharingicæ ditionis, nuper à Gallis occupatum recepit. hæc etiam præcipua causa fuisse putatur, quod rex suo exercitu in Galliam redierit, magno Cæsaris emolumento. Cum hoc modo Martinus magna autoritate inter Belgas uiueret, tādē reginam Mariam Antuerpiam cum copijs comitatus, ibidem aliquot motus compescuit, & paulo pōst ibidem inter uiuos agere desijt, anno salutis 1555. Ioan. Sleid.